

四庫全書

集部

欽定四庫全書

集部

漢魏六朝百三家集卷一百十二下

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣祖之望

謄錄監生臣蕭肇鵬

欽定四庫全書

漢魏六朝百三家集卷一百十一下

庾信集

目錄

傳

周使持節大將軍廣化郡開國公丘乃敦崇傳

墓誌銘

周大將軍聞喜公柳霞墓誌銘

周大將軍襄城公鄭偉墓誌銘

周大將軍瑯琊定公司馬裔墓誌銘

周大將軍上開府廣饒公鄭常墓誌銘

周大將軍義興公蕭太墓誌銘

周大將軍懷德公吳明徹墓誌銘

周大將軍幽國公趙廣墓誌銘

周驃騎大將軍開府侯莫陳道生墓誌銘

周車騎大將軍贈小司空宇文顯和墓誌銘

周譙國公夫人步陸孤氏墓誌銘

周趙國公夫人紇豆陵氏墓誌銘

周安昌公夫人鄭氏墓誌銘

周大將軍隴東郡公侯莫陳君夫人竇氏墓誌銘

周冠軍公夫人烏石蘭氏墓誌銘

周太傅鄭國公夫人鄭氏墓誌銘

後魏驃騎將軍荊州刺史賀拔夫人元氏墓誌銘

周大都督陽林伯長孫夫人羅氏墓誌銘

周儀同松滋公拓跋夫人尉遲氏墓誌銘

周驃騎大將軍冠軍伯業夫人李氏墓誌銘

漢魏六朝百三家集卷一百一十一目錄下

欽定四庫全書

漢魏六朝百三家集卷一百十一下

明張溥輯

庾信集

傳

周使持節大將軍廣化郡開國公丘乃敦崇傳
崇恒州代郡鼓城縣廣義鄉孝讓里人也昔壽丘建國
賜姓者十二人平陽舉賢登朝者十六族况復大電繞

樞流星入昴派分源別幹其嗣興者乎魏道武皇帝以
命世雄圖飲馬河洛兄弟十人分為十姓辨風吹律丘
氏即其一焉五代祖邈驃騎大將軍開府儀同三司營
丘郡開國公于時天道西北既稟謀謨馬首東南實資
匡贊因以封名仍為賜氏與夫南公伯即有連類宗則
樂正非無準則曾祖雙軌使持節驃騎大將軍司徒青
兗二州刺史范陽文昭公洛食之始上馬治國登庸之
初昇槐論道生則絕席武宮死則配祠清室夫人太原

王氏三世為將四代為公社稷大宗鐘鼎貴族伉儷是
歸秦晉匹也祖提使持節衛將軍駙馬都督河交二州
刺史靈壽縣開國公公子公孫聲名藉甚增輝增耀弱
冠昇朝夫人清廉郡長公主孝文帝之第二女也王姬
有行車服不繫故得衛青上將張耳賢夫父願使持節
大都督徐州諸軍事徐州刺史平陽縣開國公食邑四
千戶少年習象多見兵書澆沙聚石之營却月橫雲之
陣彎弧則戟破小支抽劒則泉飛枯井夫人宇文氏周

文皇帝之第三妹也母儀令範女師賢哲德高隆慮義重河陽魏受其終周新其命式墓封墳追旌盛德乃贈使持節大將軍廣化郡開國公食邑一千戶夫人贈安德郡長公主遊魂寃結非無廣漢之城久客思歸唯有東平之樹自永安以來魏室大壞海水羣飛天星亂動禮樂征伐不出於人主舉賢誅暴議在于強臣高丞相驅率風雲奄荒齊晉我舅氏文皇帝駕馭龍虎據有周秦南北渝盟東西敵怨既而各受圖書並當珪璧百姓

則父南子北兄東弟西事主則憂親求生則慮禍大周
親戚徧鍾荼炭輸之城旦下之織室闕河嚴隔三十餘
年天厭喪亂人思反德彼之風塵既靜函谷此之冠蓋
屢涉漳濱中山冤枉之餘代郡凋殘之澤並遇革音咸
蒙禮送崇賓兄弟二人相看氣息親愛凋零方寸久亂
恒山殺翮豈望同飛而安國徒中鬱為卿相班超絕域
遂得生還天和四年至於新邑朝廷以舅甥之國外內
之親乃授賓使持節驃騎大將軍開府儀同三司大都

督安樂縣開國公食邑一千戶賓得免虎口仍上龍門
聲價已高風焱即遠方欲討論國恥申雪家冤橫尸原
野是所甘心時不我與先從朝露春秋若干衛國興文
子之慟長安有詔葬之悲乃贈本官加少傅蒲虞勲三
州諸軍事蒲州刺史以天和六年某月日葬於長安之
洪瀆原妻青州石氏長城郡君肩子孤乳生妻嬖室即
能有節還成守義崇蒙授使持節大都督驃騎大將軍
開府儀同三司廣化縣開國公食邑一千戶昆季二人

同年上將彤廷交映榮戟相臨昔二馮同德繼踵當官
兩杜齊名夾河為郡比斯榮寵彼將慚色俄然賓疾奄
捐館舍崇兄弟勝衣備罹禍酷同氣長養得及全人今
者來歸更連凶閔每一悲慟行路傷心撫養愛子情深
馬援之慈恭事寡嫂義甚顏含之孝天和六年授大將
軍餘如故龍庭賞出塞之功玉門勞旋師之寵異代同
和見之今日建德二年授使持節都督宜州諸軍事宜
州刺史忽忽橫閣但有誦書曖曖重帷惟聞善政清不

置水明非舉燭乃是入境移風非直停車待雨有勅大將軍宜州刺史廣化郡公崇自夏季無雨以迄於今雖靡神不禱仍未降感知彼州內獨蒙滂澤諒由大將軍精誠所至憂念郡人豐稔可希良以為慰又勅廣化公崇知此存心政術治勤黎人受委稱職嘉尚無已古人有言非行之難念加勉勗以致盡善指令宣納抑操賜齊陳物如別宜諭朕懷昔陽平太守別降紅粟之恩荊州刺史偏蒙袞衣之賜治績尤異此之謂乎崇清淨為

政廉明為法人不忍背吏不忍欺性不飲酒無所嗜欲
深沈牆仞喜愠不形文必正詞絃惟雅曲仁義禮節是
所用心緹袂緗素愛翫無已當今四郊多壘尚有公卿
之辱鼓輦不息猶勞將帥之謀語其讐恥唯願橫行死
地思其報國不吝身膏原野但今天假之年時綏之福
忠貞之事公其取焉略書梗槩陳之直史

墓誌銘

周大將軍聞喜公柳霞墓誌銘

君諱霞字子昇河東解縣人也秦始征晉之地漢開平越之鄉律中夷則星居鵠首况復莊謀於衛既為社稷之臣喜對於齊無廢諸侯之職祖叔珍宋員外散騎常侍義陽內史有徐邈之應對居于散騎之省有汲黯之正直理于淮陽之郡父季遠臨川王諮議叅軍宜都太守蘭臺石室是所洽聞白馬飛狐逾高詞氣西都吳融擅名江表言談相會宛如舊焉君膺令德之靈稟冲和之氣齒鬣髣髴智早成愛敬自天虔恭得性含仁抱

義履信居貞世父儀同忠惠公特加器異乃謂公曰吾
昔逮事伯父太尉公見語云我昨夢汝登一高樓樓盡
峻麗吾以坐席乞汝汝或富貴恨吾不及見耳吾向聊
復晝寢又夢將昔時坐席還復賜汝汝官位當復見及
王祥佩刀世為卿族鮑永驄馬家傳司隸以此連類差
無慚德輕車西昌侯作藩襄漢君時年十二以民禮修
謁進止端詳神情雅正侯目送之不輟試遣左右踐君
衣裾欲視舉動君徐步稍前曾無顧盼魏侯之見劉廙

不覺斂容漢主之觀田鳳遂令題柱比之今日曾何足
云驃騎廬陵王帝子出藩懸衡高選以君華望召為主
簿張坦直諫既稱荀令之香鄒湛知言彌見羊公之德
諮議府君于都薨背君奔赴六日即屆京師形骸毀瘁
不復可識靈柩泝江中川薄晚亂流乘選迴風反帆舟
中之人相視失色抱棺號慟誓不求生俄爾之間風波
即靜咸以君精誠所致成都孝子自赴江流桂陽先賢
身彰野火並存靈應咸可傷嗟太夫人乳間發瘡醫云

惟得人吮癰血或望可差君方寸已亂應聲即吮旬日之間遂得痊復君於事親可謂至矣從兄右衛擁旌嶺表苦相攜致昔馬遊志氣為馬援所知班嗣才學為班彪見賞復聞於今日矣乃除永化縣令靜尋歆案或吟長岑之遠乍撫鳴琴不以河陽為陋日南金柱合浦珠泉曾莫經懷未嘗留目解巾平西邵陵王法曹叅軍仍轉外兵除尚書工部郎始入禮闈即登蘭閣尚書僕射陳郡謝舉人望國華引君言論謂同坐曰江漢英靈見

於此矣西中郎岳陽王以綠車之重臨西河之牧拔用
君為本州治中尋遷別駕王叔理以品物流名陳仲舉
以題軒馳譽君之展驥兼而有之及乎大盜移國王室
騷然月動星搖雲平虹直岳陽王承制硃左當壁漢南
天網所頓英賢畢集授君吏部員外郎散騎常侍兼太
子侍讀監儲甲觀事重史丹侍講桂宮名高張禹俄遷
車騎大將軍大都督賜爵聞喜縣公侍中開府儀同三
司餘如故方之騾乘霍去病為侍中譬彼將兵公孫敖

為驃騎足以照耀六府謨明九德豈直允諧上將匡贊
中軍而已哉既而言從梁國服政鄴都管仲有詞即受
下卿之禮臧孫見德還奉嘉賓之宴有詔授使持節驃
騎大將軍開府儀同三司霍州諸軍事霍州刺史犀節
去關袞衣馳傳迎郊則文學前驅賓衛則邦君負弩直
以五溪遼遠馬伏波之思歸三湘卑濕賈長沙之不願
是以宜城刺史直會鹿門白沙故地仍留龍種天厲弗
戒奄然終極天和某年歸窆于襄陽白沙之舊塋君器

宇詳正風鑒弘敏澡身浴德游藝依仁汝南令望扶風
長者不言財利王夷甫之為德不談人物阮嗣宗之為
人從容亂離之後保此令名舒卷風雲之際無妨貴仕
張衡渾儀之後即賦歸田杜預沈碑已來遂停鄉里王
仲宣有讀書之樓諸葛亮有彈琴之宅實欲因此謝病
閒居終焉鳴琴在膝或對故人寶劒自隨時遇稚子百
年俄頃嗚呼哀哉遂使君子之陵止埋銅劒賢臣之墓
唯銘石函銘曰

有莊有惠居魯居衛義是隨時才堪濟世北部尚書東
京司隸必復其始侯君相繼華蓋一岳文昌一星青衿
辨志童子離經義勗非馬書勤映螢往年靈樞漂泊江
池以君哀慟川后停波揚名北海馳譽西河誰登九折
不入朝歌蔚炳胥變攀陪遂遠白鹿隨軒丹輦附冕位
叅上將榮蕪本選蛇盤綬結龜迴印轉來朝平樂歸政
咸陽蕃維即啓軍幕仍張起茲禮數峻此戎章長離宛
宛刷羽陵江世急奔流年催驚隼滅沒頓轡扶桑搖軫

智士石折賢人星殞西鄂芝枯南陽菊盡愴焉啓手生
榮終極相杵輟春鳴機罷織紵紵屑子視陰餘息霜露
履之哀哉樂棘龍巢北望鳳闕前觀松長風遠地厚泉
寒書埋簡落琴覆絃寬贈行之冊書而納棺

周大將軍襄城公鄭偉墓誌銘

公諱偉字子直滎陽開封人也周宣母弟就封于鄭河
洛之地即有民人號鄆之君非無郡邑其後蛇鬪于門
竈嘗于鼎韓侵負黍晉滅陽城其祀忽諸以國為氏祖

徹撫軍贈濟州刺史父先護驃騎大將軍儀同三司襄
城郡公青州刺史永安中洛城晝掩黃河凌合翟泉會
盟之地蒼鳥忽飛武庫兵欄之中鱗魚遂上三帥北緇
五馬南浮梁武帝大造中原樹君伊洛公憑軾棧車言
歸舊壤起為通直散騎侍郎天厭魏德政在強臣公恥
入亂階乃于陳留起義太祖封函谷而待諸侯坐鄴宮
而朝羣后威懷是接席卷西飛大統三年入朝蒙授武
陽縣開國伯食邑六百戶尋除龍驤將軍北徐州刺史

開河橋之陳解王壁之圍張旃於富平被練於伊闕探
虎穴而揮戈上魚門而懸胄故以策名司勲功高勇爵
魏將侯景狼顧荊河天子命我偏師赴援垂餌虎口中
途背盟事獲交綏公之力也除中軍將軍散騎常侍大
都督襲襄城郡公食邑二千戶仍除使持節車騎大將
軍儀同三司餘如故遷驃騎大將軍開府加侍中常伯
位重霍去病之登朝上將官尊公孫敖之出塞以今方
昔異代同榮魏後二年授大將軍江陵防主都督十五

州諸軍事吳兵教士艦舳習流島嶼憑陵波瀾衝激公
暫臨江界已悉南越之兵裁泛樓船即善昆彌之戰遂
得安歌澧浦拜節潯陽留魯侯而宴章臺對齊人而畋
雲夢周保定元年授使持節都督宜州諸軍事宜州刺
史天和六年授都督華州諸軍事華州刺史餘如故嶠
函重嶂汧渭分流陽陵之溢既奔華陰之學還聚而消
渴連年屢有相如之患至于大漸遂如范增之疾桐君
對藥分闕神明李柱侍醫更無方技以天和六年四月

十七日薨年五十七詔贈本官加少傅都督司豫洛相
冀五州諸軍事司州刺史謚曰肅公禮也天子輟朝彌
深大臣之議羣公會葬咸得同盟之禮夫人李氏頓丘
貴姓卿相之門賢才之室霜露先侵策封郊次以其年
十一月六日合葬于咸陽之長安縣某原合葬非古既
異三王之前死則同穴還同六載之始雖復銜珠兩鶴
同歸紫蓋之松出匣雙龍共沒延平之水嗚呼哀哉乃
薦銘曰

國有巖邑朝多君子武公莊公平王卿士溫麥渝盟祔
田廢祀驟乘停輿來朝識履惟祖惟考既侯既公樞機
周密出納清通治繁政簡處亂心雄濟河遺惠海岱餘
封世濟其美載誕其器忠無不為孝則不匱幽冀紛梗
闕河鼎沸自北自南聲聞梁魏揚旌汝潁威震三川擁
旄江漢席捲樓船成皋塵起廣武烽燃廩興麗箭雁落
驚弦總衛蘭錡申威河外山頽鼓樓樹如車蓋都護兩
道將軍獨拜梧桐茂苑楊柳倡家千金回雪百日流霞

凋零倏忽悽愴榮華河陽古樹金谷殘花隴昏雲暝山
深路晚風氣繞高松聲即遠疇昔親友懽愉交結不為
平生應為此別

周大將軍琅瑯定公司馬裔墓誌銘

公諱裔字遵胤河內溫人也南正司天北正司地是謂
義和之官即嗣重黎之政卽之歸楚與章邯而並封豫
之避秦共毛公而俱去祖金龍仍居選部水鏡三臺父
悅再牧荆河威風千里而身遭禍機遂為樂布所哭獲

存遺嗣實賴程嬰之忠國家追念功臣更撫叔敖之子
言思官族還求女齊之肩公始應辟為河內功曹除員
外郎常侍汲郡治兵黃河浮馬摧鋒軹關之捷逐北長
城之陳授平東將軍北徐州刺史柳泉風塵三城席卷
棠陰鋒鏑千室入關遷車騎大將軍儀同三司開國龍
門縣伯仍除巴州刺史雖復巴水三迴夷歌數曲徒逢
白竹之弩已濟青衣之功朝廷以漢之功臣須開上將
之府晉之代胄宜紹瑯琊之國遷驃騎大將軍開府改

封瑯琊公食邑一千五百戶宮闈近密寔侯忠貞詔為
大御伯仍除大御正職司常伯任總夔龍王道既平絲
言惟允尋除始州刺史都督始州諸軍事蠻夷恃險狼
顧鴟張高山尋雲深谷無景九地縱橫三門起伏峰危
馬束水險橋飛遂得谷靜山空水消霧散仍為信州刺
史都督信州諸軍事精兵守于白帝足懼巴州之城船
梯下於荊州彌動西陵之戍即授使持節大將軍都督
西寧州諸軍事西寧州刺史將啓北戶之人向通雲南

之國聞寵若驚奄從深夜天和六年正月十八日亡春
秋六十五詔贈本官加懷邵汾晉四州刺史謚定公禮
也以建德元年七月十三日葬于武功郡之三疇原公
愛敬純深有隱無犯忠貞亮直知無不為在戎四十二
年身經六十九戰至於多竈唱籌並得成功飛沙擁石
未嘗乖律恂恂教義吳起西河之風閑閑鼓旗李牧長
平之政身死之日家無餘財山水所資一由詔葬有始
有卒生榮死哀銘曰

祝融是命重黎克舉公族乃建天官即序避世于秦承
家于楚金行失馭玉鏡淪輝我之烈祖識變乘機黃旗
東沒青蓋西飛落星置道長州出圍及我皇父荆河再
撫世屬喪亂身沒猾虜嗟我遺嗣崎嶇趙武寒覆鳥翼
飢吞獸乳獲歸河內更襲瑯琊年方竹馬怨結長蛇藏
兵九地置劔千家雪山埋馬冰河陷車既乃班政超然
榮守朱鷺頻飛金龜轉紐築塞長榆營軍高柳玉案推
食河橋勸酒石門冰釋金堤電散蘆水門闕茅津成觀

馭風逸翮修途始半建武功臣先悲吳漢沈寥搖落游
揚浸徹金城路斷郡塢人稀風松雲蓋白水山衣賢已
星殞人沒蘭衰

周大將軍上開府廣饒公鄭常墓誌銘

公諱常字子元滎陽人也周宣王之弟初封其國鄭穆
公之孫始成其姓祖思慶建威將軍山陽太守考項儀
同三司豫州刺史南陽坐嘯值此邦君西河建隼逢斯
刺舉公侯繼踵冠冕連鑣可得而言傳於史籍公髫髻

知禮早年馳譽就經黌舍略見書堂習武兵欄偏知劒術雖復年猶小學已為儒者所稱位在偏裨即入將軍之賞大統三年起義華陽授永安縣開國男文皇帝霸迹初基英雄輻輳公拔劍棘門潁川從我洛城逆戰壯於白馬之兵河橋解圍勇于烏林之策授平東將軍帥都督襲父封魏後三年授持節車騎大將軍儀同三司車騎用郭淮之勲儀同取王沈之貴公之此授僉曰得人進爵廣饒縣公邑千戶保定三年授使持節都督遷

州諸軍事遷州

神道碑作羅州刺史今墓誌作遷州按隋地理志西魏時于竹川縣置羅州宇

文後周于房陵郡置遷州至隋并號房州

刺史即總領金州兵馬開拓北戎

高山尋雲深谷無景梯繩乃上浮竹裁通閩越影嚮勾

吳聲勢公出戰短兵並皆奔北瓦解冰碎山空谷靜授

持節開府儀同大將軍柏梁高宴有大將軍之詩幕府

初開有平陵侯之國比之今日豈可同年而語哉自是

使車被之繡服風謠是察刑政是觀公露節東驅風奔

羣盜埋輪當路威振中原武皇帝有盟津之師以公為

中權之勁外從決勝內侍軍謀及文軌既同旃旌已偃
司勲行賞軍吏舉功乃授使持節上開府增邑五百戶
賜姓宇文與國同乘之榮周之宗盟非復異姓之後蕃
屏是寄隆寵所歸公室無疎此之謂矣九州都督須得
其才千里諸侯實俟其政乃為使持節都督東徐州諸
軍事徐州刺史尋遷南兖州諸軍事南兖州刺史公頻
總六條再勞十部俗變風移人懷吏畏滯穗遺秉有利
疲人山桑野蠶足充貢賦化被殊俗威行鄰境奏事京

師四方第一謂真刺史其在斯乎春秋未高奄然遘疾
以大象元年薨于州鎮時年六十三嗚呼哀哉吏人扳
慕飛走變色河濟輟舂淮沂罷市以今年歸葬於滎陽
之山詔贈某官禮也嗟陵谷之貿遷懼徽猷之永遠地
久天長敢鐫貞石銘曰

荆河惟豫洛食之本水遶滎波山斜陸渾德星猶照祥
風未遠代不乏賢文無闕袞公之生也實降英靈忠為
德本孝稟天經觀書虎館學劒龍亭雕弓偃月行馬流

星置陣黎陽麾兵官渡平陰聽烏馬陵書樹氣視迴津
星占飛步火斷羌營沙崩賊路及驅犀節乃牧雄州吏
不驚夫人無喘牛西蠶得歲東作逢秋草爛獄戶星低
市樓五將星亡三台岳折哀哉天道遂常明哲棟梁崩
壞風雲寂滅北郭長悲東都永別幽深北地宅兆斯憑
山迴虎園路上魚陵悲風夜烈苦露晨凝蘭芬菊茂終
古相承

周大將軍義興公蕭太墓誌銘

昔司徒之數五教當堯讓之初丞相之總萬機值秦亡
之後若殷人受氏乃承微子之封梁運應圖實啓延陵
之國公諱太字世怡蘭陵人也太祖文皇帝之孫鄱陽
忠烈王之子派別天潢支分若木直幹自高澄源已遠
茂親明德是稱毛畢之功宗子維城乃建邢茅之國大
同元年年十六封豐城縣開國侯食邑五百戶山臨鶴
塞非無陶侃之賓氣連牛斗即有張華之劔解褐給事
中仍太子洗馬公子出身非郎官而同品中朝洗馬異

式道而前驅以公居之誠為高選大同元年入直殿省
其年轉太子中書舍人南宮宿衛職司蘭錡北閣從班
榮叅顧問通籍兩宮得賢斯在大同三年授持節仁威
將軍譙州刺史褰帷祥氣之境刺舉消憂之地南陽風
俗文學更多美稷相迎童兒逾遠既而亂離瘼矣王室
騷然大夫有行役之悲君子有無期之怨背闕懷楚扁
舟而行江漢奉當璧之君華夏歸中興之主承聖元年
拜侍中無雙對問實踵武于丁鴻多識舊章足齊衡於

王粲二年除持節平西將軍臨川內史仍轉平南將軍
桂陽內史尚方鑄劍再轉金龜御史分符雙封銅虎豈
直鄧攸清白見稱五鼓之歌劉寵廉能名為一錢之郡
遂以天保未定王途多梗還吳不可歸蜀無路臨淄負
海翻然改途竄身清漳垂翅渤海蒙授車騎大將軍散
騎常侍仍為持節都督永州刺史而秦亭壓境邾析聞
城鼓角地鳴將軍天落雖復瓶缶聽聲無防于地道冠
繩柴結不却于雲梯請命受降翻歸都護周朝以楚材

晉用不停於平章趙璧秦求無論於羈遠以保定五年
除使持節驃騎大將軍開府儀同三司義興郡開國公
食邑一千三百戶天和二年授使持節都督蔡州諸軍
事蔡州刺史楚項襄之愛子既布衣而幽谷魏安釐之
母弟亦羈旅於邯鄲憂既傷人降年不永春秋五十有
一薨於蔡州之鎮送故入關空餘衮服歸軒在道還更
垂帷嗚呼哀哉有詔贈官謚某禮也五年十一月葬於
長安北原櫟里子之墳正臨武庫太史公之墓直對皋

門銘曰

玄鳥遠烈相土弘謨東封宋社西斂秦圖人承佐漢國
紹開吳有美令德茂親藩郎建國皇支承家帝弟率由
冥會亮直天啓轅固聞詩唐都習禮博望之苑金華之
宮文林講德武帳叅戎名書柱上策滿帷中託身淄右
莅政淮東秦亭西逼楚澤南窮時驚獵火或懼秋風屬
斯遠略逢茲應變陣橫十里兵圍一面月暈孤城塵驚
虛援春筍非糧秋蒿無箭垂翅卧龍夷矜輟戰時值懷

來恩加始賞王爵愈峻戎章更上朱鷺才飛虞歌即響
泣子留恨藏書長往炎涼迭運零落山丘霜芬幕月松
氣陵秋嗟南國之王子成東陵之故侯

周大將軍懷德公吳明徹墓誌銘

公諱明徹字通昭兗州秦郡人也西都列國長沙王功
被山河東京貴臣大司馬名高霄漢豈直西河有守智
足抗秦建平有城威能動晉而已也祖尚南譙太守父
樹右軍將軍抗拒淮沂平夷濟漯代為名將見于斯矣

公志氣縱橫風情個儻圮橋取履早見兵書竹林逢猿
偏知劍術故得勇爵登朝材官入選起家東官直後除
左軍葛瞻始嗣兵戈仍遭蜀滅陸機纔論功業即值吳
亡公之在梁未為達也自梁受終齊卿得政禮樂征伐
咸歸舜後是以威加四海德被諸侯蕭索烟雲光華日
月公以明略佐時雄圖贊務鱗翼更張風飈遂遠冠軍
侯之用兵未必師古武安君之養士能得人心擬于其
倫公之謂矣為左衛將軍尋遷鎮軍丹陽尹北軍中候

總政六師河南京尹冠冕百郡文武是寄公無愧焉滿
湘之後憑陵島嶼風船火艦周瑜有赤壁之兵蓋舳櫓
艫賀齊有橫江之戰仍為平南將軍開府儀同三司都
督湘衡桂武四州刺史遂得左廣迴扁轡車反暢長沙
楚鐵更入兵欄洞浦藏犀還輸甲庫雖復戎歌屢凱軍
幕猶張淮南望廷尉之囚合肥稱將軍之寇莫不失穴
驚巢沈水陷火為使持節侍中司空車騎大將軍都督
南北兗青譙五州諸軍事南兗州刺史南平郡開國公

食邑八千戶鼓吹一部中台在玄武之宮上將列文昌
之宿高蟬臨鬢吟鷺陪軒平陽之邑萬家臨淄之馬千
駟坐則玉案推食行則中分麾下生平若此功業是焉
既而金精氣壯師出有名石鼓聲高兵交可遠故得艣
舳所臨蓋於淮泗旌旗所襲奄有龜蒙魏將已奔猶書
馬陵之樹齊師其遁空望平陰之烏俄而南仲出車方
叔莅止暢輟文茵鈎膺偉革遂以天道在北南風不競
昔者裨將失律衛將軍於是待罪中軍爭濟荀桓子於

焉受戮心之憂矣胡以事君宣政元年屈于東都之亭
有詔釋其鸞鑣蠲其釁社始弘就館之禮即受登壇之
策拜持節大將軍懷德郡開國公邑二千戶歸平津之
館時聞樞馬之嘶舍廣成之傳裁見諸侯之客庶頗眷
戀寧聞更用之期李廣盤桓無復前驅之望霸陵醉尉
侵辱可知東陵故侯生平已矣大象二年七月二十八
日氣疾暴增奄然賓館春秋七十七即以其年八月十
九日寄瘞于京兆萬年縣之東郊詔贈某官謚某禮也

江東八千子弟從項籍而不歸海島五百軍人為田橫
而俱死焉嗚呼哀哉毛修之埋于塞表流落不存陸平
原敗於河橋死生慙恨反公孫之柩方且未期歸連尹
之尸竟知何日遊魂羈旅足傷溫序之心玄夜思歸終
有蘇韶之夢遂使廣平之里永滯冤魂汝南之亭長聞
夜哭嗚呼哀哉乃為銘曰

九河宅土三江貢職彼美中邦君之封殖負才矜智乘
危恃力浮磬戢鱗孤桐垂翼五兵早竭一鼓前衰移營

滅竈空幕禽飛羊皮詎贖畫馬何追荀瑩永去隨會無
歸存沒俄頃光陰悽愴岳裂中台星空上將眷言妻子
悠然亭障魂或可招喪何可望壯志沈淪雄圖埋沒西
隴足抵黃塵碎骨何處池臺誰家風月墳塋羈遠營魂
流寓霸岬無封平陵不樹壯士之隴將軍之墓何代何
年還成武庫

周大將軍幽國公趙廣墓誌銘

公諱廣字乾歸邵惠公之元孫幽孝公之長子若木拂

日長蛇委天龍圖幕河之光神鼎連雲之氣六辯構宇
五運徵祥是以維嶽降神自天生德凝脂點漆日角珠
庭為子則名高五都為臣則光照千里華蓋中天之峰
未階其峻虞淵浴日之水不盡其源歲在凋車年方竹
馬月中桂樹切問能訓石上木生懸思即悟年十一孝
公薨焚焚在疚孺慕過禮泉驚孝水竹動寒林三行克
宣八翼斯舉大周建國宗子維城設壇封人分司典命
開國天水郡公食邑二千戶元年授使持節驃騎大將

軍開府儀同三司其年四月授都督秦州刺史孝公久
牧汧隴遺愛在人今茲見撫我君之子豈獨司隸之臺
鮑宣累葉丞相之府韋賢重代二年拜大將軍方衛青
之張幕冊重元勲譬韓信之登壇榮高獨拜武成元年
遷都督興梁等十九州諸軍事梁州刺史嶠冢導漾乃
濟漢之東流蔡蒙旅平實華陽之西極其年九月改封
蔡國公食邑萬戶地接韓城關隣楚鄣戶封八縣恩深
寇恂之功邑啓萬家事極曹叅之賞保定元年授小司

寇犴戶苔生圉關驚動載酒屬車幸無冤氣觀囚軍府
或聽鳴琴二年轉守蒲城都督潼關等六防諸軍事其
年閏月遷都督秦渭等十二州諸軍事秦州刺史公亟
牧冀城頻藩隴坻豪桀斂手貪殘解印加以上谷精兵
漁陽噪鼓北臨高柳南望長榆匈奴下馬之山貴相藏
酒之谷莫不遠慕威聲遙承風化二年奉詔向甘州迎
皇后有文在手仲子之歸紀裂繻來卿為君逆自非名
高絕國威被和鄰豈得稱族而行尊君之命四年授柱

國大將軍昭陽以功高見用項梁以名將當官以今方之彼有慙德天和三年授都督陝虞等八州甘防諸軍事陝州刺史屈產垂棘既有滅虢之兵王官羈馬非無絕秦之路公以正正鼓旗閑閑車軌服叛威邊算無遺策但以中外久勞積斯災疾山川則並走羣望賓客則諸侯在門是以請謁承明言歸湯沐方詢夏郊之祀或辯桑林之祟更除秦州刺史仍襲父爵幽國公分流之嶺未登晚塞之城空望太夫人以公羸瘠悲泣相守胸

氣交銜奄捐館舍公頓伏苦寢水漿不入雖王人勸奪
創鉅愈增母死于子子死于親慈孝之道一朝惣集大
漸之辰春秋二十有九四闕罷市三軍行哭言尋聽訟
猶見寒棠還顧空營惟餘衰柳謚贈某官禮也六年六
月歸葬於秦州之某原玄甲啓路追旌驃騎之功龍旂
贈行深悼東平之遠公亮直惟忠溫恭惟孝居之仁義
飾以禮樂風神機警聰叡精明有仞于宮牆無形于喜
愠金版玉策之記枕籍忘疲蘭葉之花之圖膏映必舉

碣石秋雲昭陽落月思風含臆言泉流叨翩翩書記則
阮瑤陳琳荏荏風流則王濛謝尚語其百發弓絕于猿
吟論其百中劍深於雁陣枚乘之望梁苑不憚棄官樂
毅之求燕路無辭千里至如應變將略雷電立成帷帳
謀猷孫吳闇合有品藻人倫之志有清平天下之心鵬
路忽摧龍津遂壅嗚呼哀哉太宰早茂三荆長辭萬始
撫養遺孤連枝同氣馬援之誠兄子義存謹飭王況之
事世叔情深愛敬同德比義此之謂乎乃為銘曰

御乾從紀乘離作聖白環讓德玄珪受命平一地紐增
輝天鏡傍廕數國前臨七政地屬先登時逢下武玉璜
撥亂金縢光輔衛晉承家邢茅胙土波分建木派流玄
扈景命寅序徽猷淵塞忠有令圖孝為全德山節莅政
桓珪守國瀚海將臨燕山行勒平樂高宴金華說經論
儒璧水觀禮明庭相風待賦承露須銘乘舟向日策馬
隨星德舉克明賢能允淑上將受脤元戎推轂趙失東
漁胡亡南牧箭下聊城泥封函谷袞衣頻露丹襜亟卷

約法情推繁辭理遣盜烏懸察疑蛇立辯人共官園家
同野繭簫雲推景轉風落仞星裂中台山傾左鎮夏楹
舍爵殷階啓殯緣幕躡行明旌庭引秦川直望隴水分
飛山河滿目容衛靈歸陵圖石馬車畫袞衣小山搖落
長林變衰淒愴原隰荒涼宅兆樹密人稀山多路小十
里松城千年華表夜臺尤寂窮泉無曉

周驃騎大將軍開府侯莫陳道生墓誌銘

君諱道生字某朔州武川人也本系陰山出自國族降

及于魏在秦作劉父少興武川鎮將山河抗拒關塞被
邊早擅威聲咸多雄烈君讀書馬上清談劒端獨運六
奇專精三略雖復身居末將而勇冠旌門位在支軍而
謀叅幕府魏正光五年任統軍隸天柱爾朱榮征北海
王永安三年隨太師賀拔勝入關尋轉別將滑源卷甲
闚城東馬並皆克捷君有力焉永熙三年補都督太祖
文皇帝奄有關河令行天下以君幹略委之爪牙名洽
中涓功叅上佐兵臨河曲前登白馬之津寇發蒲城先

戰黃沙之苑臨晉橫船既禽趙將馬陵削樹復下魏兵
班瑞司勳披圖疏爵授驃騎大將軍金紫光祿大夫鄴
縣開國公食邑五百戶趙儼之為驃騎正駕單車張湛
之拜光祿長乘白馬以斯連類朝野榮之大統九年更
姓侯莫陳氏隨大將軍拓跋遠經始陽二水長闕三川
無市擐甲構病死于轅門春秋五十一贈持節都督朔
州刺史君在武川文皇帝同鄉里霸功既立王業克成
不忘捨講猶論償博今嗣德維新功臣追遠東都馬鳴

不無見日之歎北陵車過終憶平生之言有詔更贈使
持節驃騎大將軍開府儀同三司都督宜敷絳三州諸
軍事敷州刺史謚某公禮也夫人拓跋氏安邑郡夫人
庭有鐘鼓家承箴誡教容教德言告言歸天和五年六
月薨即以其年十月同葬于京兆某縣洪源鄉武子成
寢請西階而合葬平陽下嫁即廬山而共墳銘曰

凝陰遠寂廣漠平寒沙窮瀚海地盡皋蘭塞鴻秋去胡

桑夏乾風土壯氣山河凜然師

一作兵

旅上谷威雄武川

君則繼踵代不乏賢臣有忠劍庭流孝泉魏室多故餘
風未殄天保讓德當途廢典上將指蹤中涓力展洛城
夜捷河梁朝剪鐵劍金龜榮追玉鉉身胄漢祚門承魏
緒並擅華宗俱稱當路伉儷云匹年齡並故趙瑟秦聲
同為丘墓小陵石柳洪原鄉土芻靈兩引池柳雙前隧
路仍合松城即連霜隨柳白月逐墳圓芝蘭幾代陵谷
何年

周車騎大將軍贈小司空宇文顯和墓誌銘

公諱顯和字某上黨武鄉人也自大霧浮河長虹映渚
承源于若水纂系于蒼林上黨居衛之西常山在趙之
北因地為氏可略而言焉祖求南衛將軍冀州刺史父
金殿鎮遠將軍兗州刺史並控鶴兵俱張戎樂聲榮之
盛繼踵當年公稟山嶽之靈擅風雲之氣容止矜莊聲
名籍甚彎弧挽強左右馳射故得名高上谷威震樓煩
襲爵安吉縣侯食邑五百戶永興三年幽并叛換有無
君之心帝顧謂公曰天下沟沟將若之何公曰擇善而

從之乃誦詩云彼美人兮西方之人兮帝曰是吾心也
乃定入關之策以公母老家大令預為計公曰今日之
事忠孝不並君不密則失臣臣不密則失身帝愴然改
容曰卿是我王陵遷朱衣直閣閣內大都督改封長廣
縣公邑一千五百戶武帝初至潼關太祖親迎漆水太
祖素知公名而未之識也目于衆疑而不問直云令此
人射水傍小鳥應手即著太祖喜云我知卿名矣即用
為帳內都督滄州諸軍事滄州刺史增邑并前二千五

百戶黃公衡之決事魏后是以推心潘承明之忠壯吳
王為之降禮異代同榮見之今日東夏邊隅地連荒服
井陘塞道飛狐路斷乃以公為使持節衛將軍都督東
夏州諸軍事東夏州刺史白波青犢之兵銅馬金繩之
亂莫不交臂屈膝牽羊抱馬在州遘疾解任還朝小馬
留廢餘牀掛壁吏人攀戀刊石陘山雖非漢陽之城還
似扶風之路授使持節車騎大將軍儀同三司加散騎
常侍以魏後元年疾甚亡于同州春秋五十七天子輟

樂羣公會喪太祖親臨弔祭哀動左右于時兵革交侵
普斷贈謚即以本官印綬權葬于同州之北山今建德
二年二月二十三日遷喪于咸陽長安縣之洪瀆原時
逢禮樂之遷代屬謳歌之變國雖異政人足追榮乃贈
使持節驃騎大將軍開府儀同三司小司空丹延綏三
州諸軍事延州刺史謚某公禮也夫人高氏渤海人也
柔叅晉政拒曹爽之異謀起在漢庭共王陵而俱對况
乎箴訓有儀言容以德肅恭中饋賢才內則豈直不聽

雜樂以變齊國之風不食鮮禽以斷荆王之獵昔之合
葬季武子之西寢今之同穴長平侯之北陵世子神舉
兄弟至性純孝善居喪禮有終有始于身無改是以宦
成名立孝顯忠貞銘曰

北岳二名慈河兩本其峻惟極其源惟遠俗稟山川人
資台衮義烈桓桓才雄悃悃乃祖乃父繼踵威雄擬金
北陸鳴玉南宮隱若吳漢賢哉竇融負霜依德無雷向
風挺此含章生茲秉德孝實天性忠為人則暢轂鏤膺

燕南趙北弱水將通九部可勒帷幄叅謀宮闈典職善
擇忠言能防變色繁弱已勁淇園乃直戟中小支禽穿
左翼建旗赤谷揮戈武州長城萬里河水雙流潁川多
恙淮水未瘳義重穿壁恩深置郵于谷之口于渭之陽
丘山零落碑闕低昂草銜秋火樹抱春霜書劍俱沒人
琴並亡哀哀嗣子純心靡託孝水未枯悲松先落室進
巢鵲門通弔鶴功臣身殞會圖麟閣

周譙國公夫人步陸孤氏墓誌銘

夫人諱某字某本姓陸吳郡人也大夫拓境百越來庭
丞相勒兵三江席卷高祖載為劉義真長史留鎮關中
既沒赫連因即仕魏臨終誠其子孫曰樂操土風不忘
本也言念爾祖無違此心祖政驃騎大將軍儀同三司
恒州刺史父通柱國大將軍大司馬文安公匡贊經綸
叅謀揖讓名高廣武功重長平夫人七德含章四星連
曜敬愛天情言容禮典九日登高作銘秋菊三元告始
或頌春椒年十有四娉于譙國友其琴瑟愈恭節儉之

心伐其條枚實秉憂勤之德鄴地登高之錦自濯江波
平陽採桑之津躬勞蠶月天和元年冊拜譙國夫人東
武亭之妻既稱有秩南城侯之婦還聞受封柱國殿下
以若華分照增城峻土揚旌熨道問政邛都白狼之溪
途艱黃牛之坂荔枝之地險蒲萄之國夫人別離親
戚關河重阻夷歌一曲未足消憂猿鳴三聲沾衣無已
是以天厲之疾遂成沈痼玉涯難開金膏實遠建德元
年七月九日薨于成都私第春秋二十有一即以其年

十一月二十二日歸葬長安之北原詔贈譙國夫人禮
也殿下傷神秋月掩淚長松周季直之留書更深冥漠
潘安仁之詞藻徒增哀怨豈直西河女子獨見銀臺東
海婦人先逢金闕銘曰

茭陵反旆椒山止戈金精據嶺昌閣凌波西遊卿相東
裂山河華亭冠冕穀水絃歌震維徙族燕垂從宦塞入
飛狐關連鳴雁策預登阜功叅臨澗寶鼎留銘彫戈餘
贊應圖淑令秉禮言歸魚軒馮軾澤雉文衣明月照鏡

仙石支機行雲細起迴雪輕飛北降帝子南麾蜀守若
水既開靈山已鏤月峽狹啼江神牛鬪星機北轉日轡
西迴陽泉伏氣陰律沈灰鶴辭吳市鳳去秦臺神光離
合燈影徘徊雙流反葬百兩迴旌少女離位夫人去城
帷堂野設帳殿郊營山川奇事風月無情搖落丘隴荒
涼封域樹樹秋聲山山寒色草短逾平松長轉直節墳
方固園陵永植

周趙國公夫人紇豆陵氏墓誌銘

夫人諱舍生本姓竇扶風平陵人魏其朝議列侯則莫
能抗禮安豐奉圖功臣則咸推上席外戚列傳既聞建
武之書仲山古鼎或表單于之獻祖略少保建昌郡公
父熾柱國大將軍太宗伯鄧國公孟津大誓常預同德
之臣咸陽違約克贊先登之主並得位入六府功叅八
柄夫人有文在手有象應圖榮曜夙彰徽華早茂肅恭
以禮受教于公宮言容以德有聞于師氏及乎進賢君
子內主邯鄲琴瑟在堂輜駟是服長久于節不無秋菊

之銘履端于始或有椒花之頌豈止莊姬掩笑楚相知
慙定姜問兆齊兵不入武成二年冊拜趙國公夫人漢
王聞立義之婦邑以延鄉齊侯見有禮之妻封之石窰
異代同榮差無慙德柱國殿下居若木之一枝在天潢
之別派揚旌玉壘驅傳銅陵南通向日之民東被無雷
之國夫人從政月峽贊德雲門錦濯江波還臨織室山
明石鏡即對粧樓既而玉律頻移金爐不變胡香四兩
嗟西域之使稀靈草一枝恨瓊田之路絕天和五年四

月二十二日薨于成都之錦城春秋二十孫子荆之傷
逝怨起秋風潘安仁之悼亡悲深長草况復仙臺永別
無復簫聲傳母長歸唯留琴曲七年二月日歸葬於長
安之洪瀆原詔贈趙國夫人禮也雲雨去來既留連于
楚后光陰離合實惆悵于陳王銘曰

河西斗絕觀津孤起章武賢臣安豐貴仕木樓千仞金
山萬里紹慶邢姨基昌宋子施衿趙北待姆秦南紘縱
禮數揄狄駢駢義超江汜仁流葛覃玉筐迎驚金龍助

蠶敬愛純深端莊淑問有光國史無形喜愠舉案外恭
停機下訓馨馥于蘭年華于舜風雨消散神靈離絕嫠
女還星姮娥歸月左楹夕奠高堂朝發空揚凌波更無
迴雪下濕曰隰高平曰原西臨火井北望塞門猶垂雉
服尚駕魚軒平原忽矣天道何言山迴地市路沒滕城
松悲鶴去草亂螢生新雲別起舊月孤明賢墳永式節
隴常貞

周安昌公夫人鄭氏墓誌銘

夫人諱某滎陽陽武人也周宣王之母弟俾侯于鄭鄭
莊公之重世卿士于周以國為族自茲而始祖瓊太常
恭侯父穆司空貞公西京賦詩奉常參柏梁之宴東都
言識司空為武衛之官籍連帝譜既同盤石門稱通德
無廢儒林夫人禮義閨門端莊令淑采采芣苢萋萋葛
覃及乎作配君子言事舅姑下氣怡聲承巾奉帚親戚
惟禮閨闈以睦保定二年冊拜滎陽郡君序戚升榮從
夫有秩豈惟立義之婦邑以延鄉有禮之妻封之石窀

大將軍沈犀二江夫人聞猿三峽明月靈關之阻秋風
蜀道之難掩以瑤華先從春露天和十八年五月二十
日薨于成都春秋三十六詔贈安昌國夫人禮也即以
其年十一月十六日歸葬于咸陽之白起原遂使山迴
反壤先封節婦之陵日入虞淵實掩賢姬之墓嗚呼哀
哉乃為銘曰

天河開國分畿置政地有十城人居九命疇昔之邑今
茲成姓識履傳風叅興留慶三星在戶百兩言歸虔恭

內政榮曜中闡承姑奉盟訓子停機桑園蠶績錦室鸞
飛珩璜節步藻火文衣已水幽咽猿鳴斷絕月落珠傷
春枯桂折趙瑟長辭秦簫永別貞姬掩隧節女封墳洛
濱無月荆臺失雲鳥悲傷聽松聲愴聞千年遂古百代
餘芬

周大將軍隴東郡公侯莫陳君夫人竇氏墓誌
銘

夫人諱某扶風平陵人也章武開國名高外戚之右安

豐入朝位在功臣之上祖以孝昌之始主諾淮陽父以正光之初塞帷海岱夫人生于禮義之門宗於歲誡之德虔恭惟禮令淑惟儀及乎百兩言歸三星在戶歲盟始事條枚是則有子從政猶無逸豫之心有夫出征自識山陵之兆大統十六年冊授永安郡君婦以夫尊親由子貴朝章家慶兼而有之保定二年改授隴國夫人車服禮數桂禱典則有美河魴足光彤史既而風霜所及灰琯遂侵與善何言至于大漸天和六年四月七日

薨春秋六十有六卽以其年十月十日遷葬于咸陽萬
年縣之杜原山形起伏既符白鶴之祥地勢風烟乃合
青烏之氣銘曰

觀津世族平陵豪姓四侯登仕三君從政白狼建功丹
蛇襲慶漢之廣矣先聞淑令君子朝端賢才家政替珥
以禮軒車以命讓果成庶推珠止競百年超忽千金莫
恃室謝賢夫庭辭貴子歸鞍輟露采繁廢祀室委眠蠶
衣留畫雉雲垂下澤日掩高春空帷舊館虛幕新封山

迴廣柳路沒深松游魂幾變夫人何從

周冠軍公夫人烏石蘭氏墓誌銘

夫人諱某樂陵人也晉司徒樂陵公苞後子孫就封因
即家焉扶風舊城猶存鐵市河陽故墅尚餘金谷或寓
燕陞仍仕代郡祖行代郡尹父魏司空蘭陵郡公司空
佐命魏朝少傅疑丞周室並為大族俱蒙賜姓秦晉匹
也是曰通家夫人年十七歸于宇文氏淑令端莊含章
貞吉箴盟惟儀閨闈已正某年除金鄉郡君某年改授

冠軍夫人四德小君宜其家室三事內主翻辭贊務以
保定五年四月遘疾薨時年四十有四卽以其年某月
日歸葬于京兆之某原人世風烟山川超忽陵陂青麥
儻逢貞女之墳隴首白楊或表賢姬之墓乃為銘曰

三星麗天五岳鎮地禮有其秩人居其位燕趙多奇山
川雄氣挺茲令淑惟此含章玉生庭照蘭開室香邢姨
裝服宋子河魴百兩言歸九儀從聘榆狄七彩軒車六
命鼎室辭親槐庭贊政世為閼水人成大夢迴帳山門

移燈泉洞金棗長含銀蠶永送香填柏柳路閉松城悲
鷹獨影雄劍孤鳴留連趙瑟悽愴秦笙

周太傅鄭國公夫人鄭氏墓誌銘

夫人諱某滎陽開封縣遠里人也七子賦詩足光賓客
三卿從政實靜諸侯縣乘則晉后停輿來朝則漢君識
履華胄蟬聯無虛史籍祖那秦州別駕父茂伯撫軍將
軍涼州刺史伯陽縣侯夫人令淑早聞芝蘭獨茂既容
既德言告言歸悌實溫清恭惟箴壺太傅弼諧周室股

肱攸寄夫人輔佐君子勤勞是司琴瑟既友條枚無伐
故得用之邦國成之孝敬某年月日封鄭國夫人榆狄
既加紘紼是務夫有安世之貴躬服浣濯子有文伯之
尊無忘機杼表裡惟安閨闈且正醫門有疾藥對無徵
天和三年三月二十日薨葬于長安之石安原世子某
兄弟並勗慈訓咸遵母儀霜露深悲寒泉增慟銘曰

居德圃田當官教府置騎賓來開黌學聚福履家室賢
才踵武棠棣之華螽斯之羽人倫七德風化二南采采

朱官萋萋葛覃節行聲玉副笄珈蓼柳園秉杼桑津浴
蠶春秋起忽零落無時家亡淑女國喪賢姬香墳永送
舞鶴長辭山深月闇風急松悲千年開閉將驗靈龜

後魏驃騎將軍荊州刺史賀拔夫人元氏墓誌
銘

在河之洲聞君子之配德言采其蕨見夫人之有禮用
之風化人倫厚焉夫人諱安字大羅河南洛陽人也祖
某京兆康王父昭驃騎大將軍開府儀同三司錄尚書

司州牧汝陽郡王跖萼雄圖塏基霸迹公卿之室將相
維國維家夫人能修法度無思犯禮恭儉節用憂在進
賢大統五年封樂安公主歸于賀拔氏時年十三思事
憂勤化成婦德彤管載暉棠棣早茂及乎謳歌有歸禴
狄降等輔佐君子猶安其室周天和元年乃封章武郡
君霜露不居風烟飄忽遘疾累旬奄捐館舍以周天和
四年二月二十六日薨于長安萬年里春秋五十有二
詔贈頓丘國夫人禮也即以其年三月二十日歸葬于

咸陽之石安原既異乘鸞翻然永去雖非舞鶴即掩泉
門欲誌佳城乃為銘曰

逝矣雄謀悠哉霸轍九服潛運三川中竭鄉相連鑣賢
才蕪絕琬琰令淑施衿結褵方之棠棣譬以螽斯既全
婦德還稱母儀逝水滔滔危途冉冉問藥無對蒸丹不
驗狄服空陳絃機虛掩郭門路轉哀挽途窮隴深結霧
松高聚風春蘭秋菊唯始唯終

周大都督陽林伯長孫夫人羅氏墓誌銘

夫人諱某恒州代郡太平縣人祖某父協周大將軍南陽郡公夫人資於事親躬奉訓誡教於宗室足聞詩禮及乎言歸肅恭如事蘋藻維敬紘紼是勤內位克諧中閨以睦年齡不競霜露先侵更無延壽之杯遂闕長生之枕以周天和四年二月八日薨于長安之洪固鄉時年二十有三其年某月日葬于萬年縣之壽里山非宋國翻為節女之陵地異荆臺遂有賢妃之墓銘曰

畢狼建國靈武開都地接天柱山臨寶符人資義烈世

襲雄圖葛覃維姜棠棣早盛既安淑德爰從配命四教
弘宣三星克正霜凋桂苑風落芝田三從闕性五福傷
年歸安永絕言告長捐悽切郊野紆迴隰原風慘雲愁
松悲露泣朗月空嗟傷神何及

周儀同松滋公夫人尉遲氏墓誌銘

夫人諱某河南洛陽人也祖某父太師柱國公魏室喪
亂經綸夷阻周朝建國匡翊揖讓圖諫帝系即有內外
之親分裂山河仍為舅甥之國夫人容範端莊儀刑淑

令六義觀德南風有夫人之詩八卦成形東方有少女之位姆傳習言公宮教業箴管線續佩悅莖蘭年十有二出適儀同拓跋競衣其翟服既得宗婦之儀乘其魚軒還從列國之禮標梅三實無關其時夭桃九華能修其政某年某月冊拜迴洛縣君母金明公主魏文帝長女春則帝女採桑秋則王姬禁館夫人出入王家遨遊戚里濯龍園苑長門宮殿既而膏腴美疾華茂傷年沈痼牀帳蒸離寒暑三世之術無乏于醫門百草之本徒

窮于藥性建德三年五月七日亡春秋三十昔西河女
子值九節之菖蒲東海婦人得三山之芝草無由再遇
悲矣如何即以其年十月十五日葬于京兆之北陵原
龜筮告辰丘陵啓奠西臨織女之廟南望湘妃之墳嗚
呼哀哉乃為銘曰

父曰帝師母曰王姬車服不繫江漢無思是生令淑觀
禮敦詩聲超宋子德茂邢姨繼世盛德思賢克舉奠雁
迎門濡蘋實俎奉盥如事移茵即序春水浴蠶秋機秉

杼帝鄉近親帝城近臣濯龍親戚平陽主人金波迴月
玉相臨春弄玉鳳皇昌容紫草自此千年無人得道舜
華榮曜飄零何早渭水北原平陵故園纔通谷口即望
寒門吁嗟此地去矣歸魂孟冬十月長松九年親賓掩
淚悽愴何言

周驃騎大將軍開府儀同三司冠軍伯柴夫人
李氏墓誌銘

夫人諱某隴西狄道人也周有柱史夫子以之猶龍漢


有將軍宛城以之輸馬復有西入上書仍為秦國之相
東向問計即是韓王之師父宜使持節大將軍南北二
華州刺史順陽郡公魏武皇帝之長舅也穰侯魏冉居
咸陽之宮曲陽王根借明光之殿語其貴戚差足擬倫
論其退讓彼多慙德夫人幼而聰敏早聞令淑彤管有
美賢才見稱弄其紙筆懼失諸兄之意剪其韶齡畏傷
王母之心年十有一出適驃騎大將軍開府儀同三司
烈以上將頒朔中台受任軍國忠勤規模繁總夫人輔

佐君子言容匡贊增耀三星欽明四德授中沃盥有謹
于事姑斷織停機無忘于訓子保定二年冊授大夏縣
君既以夫尊又云子貴乃遷順陽改郡君夫人之邑或
用鄉名小君之號多從夫秩典冊光臨足稱榮寵本有
風氣之疾頻年增動略多枕卧飛龜之散遣疾無徵畫
龍之符留年不驗以今建德四年三月日薨于館舍春
秋四十九即以其年八月日葬于長安之洪瀆原神光
離合尚在河湄雲氣徘徊猶歸樓下嗚呼哀哉乃為銘

曰

上書秦相立功漢將隴水分流秦川遙望秋陸俗勇金
行地壯廣武軍中安平河上妻者齊也謂嫁曰歸三星
夜照百兩朝飛榆翟有典容禮無違台庭等秩侯服同
衣子奉母儀夫聞家政七族承和九閨連慶紛悅恭肅
溫清孝敬杼乘秋成蠶隨春令年華未落電影先過徒
冷日氣空飲天河星凋玉井月掩金波虞淵落日薤露
哀歌寂寞虛奠荒涼象設幽隴龜封重泉蟻結秋色悽

愴松聲斷絕百年何幾歸於此別



漢魏六朝百三家集卷一百十一下